

四庫全書

史部

欽定四庫全書

平定準噶爾方略前編卷六

康熙五十八年春正月戊戌

議築城于鄂勒錐圖郭勒及茂岱察罕廈爾

振武將軍傅爾丹等疏言鄂勒錐圖郭勒土田

肥沃四時寒暑與內地同宜築城駐兵其設立

驛站員外郎保住已自殺虎口至鄂勒錐圖郭

勒一路詳視水草甚佳應設三十六站議政大

臣等議如所請奏入得

旨鄂勒錐圖郭勒居喀爾喀游牧地方之中與大兵駐劄處相隔千里今欲衛護喀爾喀應于阿爾台科卜多等處築城遠立哨兵方是伊等既奏鄂勒錐圖郭勒之田地肥饒寒暑與內地相同應築城以貯糧餉或于科卜多地方另築一城駐兵看管充發人等耕種其應否築城之處著問保任及喀爾喀王貝勒貝子公等會議具奏尋議臣等遵

旨詢保住及自軍前來喀爾喀王等據言科卜多地隔
大河水漲時輒阻行且材木難致修築不便近
科卜多地曰茂岱察罕廋爾水草佳美木亦易
購且其地去鄂勒錐圖郭勒千里與喀爾喀接
壤應于其地更築一城屯兵于衛護計尤便其
間宜設幾站及發人往耕種者並宜安插應令
將軍傅爾丹等詳視地形確議具奏奏入

上從之是秋八月傅爾丹等疏言茂岱察罕廋爾及鄂

勒錐圖郭勒二地各築一城每城置屋二千間
自鄂勒錐圖郭勒至茂岱察罕度爾宜設十一
站議政大臣等議應如所奏令理藩院遣司官
一人往同將軍設立驛站其夫馬車輛並視前
者古北口外設站例耕種之人于築城建房畢
時陸續發往俟耕種一年再遣官兵駐防奏入
得

旨依議設立驛站之處甚屬緊要著兵部尚書范時崇

前往料理

癸卯

命額駙吳爾袞赴軍前

先是額駙吳爾袞以母喪召還至是仍

命赴軍

諭曰今年大兵既不前進若發兵襲擊則策妄阿喇布坦情形自露著派盛京烏拉察哈爾索倫喀喇沁及內地喀爾喀兵一萬自前年進兵處往彼襲擊出兵

時不必派厄魯特王車凌旺布公多爾濟塞卜騰之人又前欲令盛京三千兵越過巴里坤地方今暫行停止此次襲擊之兵令六月發往及秋而回倘今年不便襲擊來年另為籌度爾到傅爾丹處詳議後即差人到巴里坤將軍處會議具奏

二月壬戌

靖逆將軍富寧安奏請築城于庫克車勒

富寧安奏言烏蘭烏蘇四面皆山地隘不可以

多駐兵庫克車勒形勢寬衍且去烏蘭烏蘓近
應擇庫克車勒地有水草處築城浚池駐兵二
千遣大臣二人管理鄂隆吉噶順哈洮等處並
築堡各駐兵一千所在各遣大臣一人管理約
洛圖烏蘭烏庫爾默圖二地去噶順哈洮不遠
亦築堡各駐兵五百庫爾默圖築堡駐兵三百
並令侍衛及副將等官管理諸處悉不產材木
應築土堡每堡相間處築烽墩酌量置兵令其

瞭遠遞送消息庫克車勒等處與巴里坤相間
約三百里應酌量派兵于鄂什希度集等處設
營以為應大軍駐劄巴里坤如故自烏爾圖哈
畢爾噶一路至庫克車勒鄂隆吉凡設六站臣
躬率大臣侍衛往庫克車勒等處相度何處可
築城堡烽墩及展汎界設臺站收放牲畜等務
一面修築城堡烽墩一面令兵駐劄奏入得

旨下議政大臣知之

癸亥

命分牧駝隻于鄂爾多斯

議政大臣等議曰解往甘肅駱駝五千應送寧
夏令巡撫綽奇撥官及兵丁于察罕托輝水草
佳處牧放冬時進口于寧夏支草料飼養奏入
得

旨此事議未周詳駱駝何必交付漢人仍令蒙古大臣
侍衛並兵丁看守牧放冬時亦在與駱駝相宜之處

牧放何必支領草料者另行詳議具奏尋議曰應令
沿途撥兵遞送駱駝至鄂爾多斯其散秩大臣
殷扎納策凌並侍衛等送駱駝者分兩路一出
張家口一出殺虎口徐徐驅至鄂爾多斯率彼
處官兵擇水草佳處牧放冬時亦于駱駝相宜
處牧放以備巡撫綽奇侍郎色爾圖調撥奏入
上從之

辛未

命都統法喇招撫里塘護軍統領噶爾弼赴四川辦理

軍務

法喇等疏言里塘去打箭爐甚近若遣官招撫
必當歸順巴塘民心與里塘亦相似請遣官一
人先至里塘宣示威德彼若向化即收其地戶
口清冊至巴塘亦如之若有觀望不至者于草
長時以兵臨之彼必不敢我抗應選成都滿兵
五百令協領等領之綠旗提標兵一千化林永

寧兵五百令永寧副將領之并力深入雖巴塘
以外亦可傳檄而定若察木多亦來歸順則去
藏不遠矣便當會兵取藏一面檄知西寧雲南
領兵大臣一面星夜請

旨議政大臣等議曰應如所奏即令法喇率兵赴打箭
爐駐劄遣人招撫如有觀望不至者令法喇率
兵進攻里塘巴塘即駐劄巴塘其護軍統領溫
普應調取來京成都既有滿洲兵丁應自京師

遣大臣赴成都令其管領奏入得

旨軍前大臣甚多著派護軍統領噶爾弼就彼馳驛作
速前赴四川與年羹堯一同辦理軍務法喇離打箭
爐切近即令領兵前往餘依議

癸酉

定茶禁

都統法喇疏言蒙古及西藏所在悉資茶養生
賊人即據藏地非茶斷難久居我

皇上憫念青海與里塘巴塘人衆非茶不生活以如何
分別禁止令臣等詳議臣等思唐古忒人悉為
賊所迫脅不當禁其養生之物但今松潘路茶
價甚賤青海一帶積茶必多應暫嚴禁俟彼懇
請再酌定數目令其買運至打箭爐外最近者
為里塘遣官招撫令營官收其所管番寨戶口
清冊酌量定數許之買運巴塘以外亦如此例
其打箭爐一路當視番情向背分別通禁議政

大臣等議如所奏奏入

上從之

三月辛巳

命永寧道高其佩赴打箭爐

上諭議政大臣等曰四川總督年羹堯奏據西藏之第
巴達克咱報稱策零敦多卜等將被截取藏之五百
名兵丁自巴爾喀木一路送來其或確實送來或借
送來之便相度地勢探聽信息俱未可定不可不預

為防備此所請甚是爾等詳議具奏尋議曰年羹堯
請自率兵往備之但四川省及松潘打箭爐兩
路軍務並緊要年羹堯自往不便現今議令都
統法喇子青草發時率兵招撫里塘巴塘如第
巴達克咱所報確實應以兵五百屬永寧道高
其佩往會法喇軍相機而行如借此窺探我內
地即以兵勦之設所報虛令高其佩率兵還奏

入

上從之尋年羹堯疏報臣等前聞西藏送還官兵消息
恐賊有詐曾奏請令永寧道高其佩前赴辦理
今官兵陸續至里塘者三百七十人其未到者
不過數十人高其佩可毋往里塘至官兵到省
時臣等令滿兵入荊州滿兵中漢兵入臣標一
同操練以待將來調遣議政大臣等議如所請
奏入

報可

乙未

罷吏部侍郎色爾圖都統瑚錫圖以噶什圖辦理糧餉

撫遠大將軍允禎疏劾吏部侍郎色爾圖現今奉

旨經理西寧兵餉並不實心辦事恣意遲延推諉縱家人與筆帖式戴通包攬運米通同扣剋請下色爾圖等所司嚴審擬罪再色爾圖虧空甚多糧

餉所闕緊要請更遣大臣赴西寧料理議政大臣等議悉如所請現今巴里坤有巡撫綽奇噶什圖二人應調噶什圖赴西寧料理糧餉其噶什圖所辦事令侍郎海壽兼管奏入

上從之允禩又疏劾都統瑚錫圖進藏時兵無紀律還時又不自率兵先行進口請革瑚錫圖職嚴審議政大臣等議覆如所奏尋色爾圖擬斬解京監候奏入得

旨色爾圖依擬應斬鎖禁西寧遇有苦差之處差遣瑚
錫圖擬枷號鞭責奏入得

旨瑚錫圖鎖禁西寧遇有効力之處効力

夏四月乙巳

命撫遠大將軍允禩駐兵西寧

允禩疏言據都統延信等稱準噶爾與青海部
人世為婚姻大將軍若將兵出口我軍衆寡青
海人知之準噶爾亦知之今年既不進兵我軍

可毋出口駐劄又叅將述明等自喀喇烏蘇來
云準噶爾賊人即與我戰其實懼甚土伯特人
與我兵對壘時其烏鎗輒高舉放過乘賊不見
向我營但發空鎗觀此知土伯特特為賊所迫
其人心實感

聖恩今我軍號稱三十萬進勦遣使前往大功可成議
政大臣等議曰都統延信等既謂大軍不必出
口應于西寧駐劄至一切料理駐劄及留兵若

干所用之馬于何處牧放悉令大將軍酌定奏

入

上從之尋允禩疏言臣遵

旨駐劄西寧相機而行令每佐領下烏鎗護軍各一人

公策旺諾爾布領之涼州所在每佐領下護軍

各一人副都統寶色領之喀喇沁等處蒙古兵

在寧夏者都統楚宗領之悉赴索羅木駐劄令

莊浪所在每佐領下馬兵各一人都統汪悟禮

副都統伊禮布領之涼州每佐領下所餘烏鎗
馬兵各一人副都統宗室赫世亨宗扎卜領之
悉赴博羅和碩駐劄以張聲勢再令平郡王訥
爾素公諾音托和揆慧簡親王之子永謙鎮國
將軍敬順蘓爾臣奉恩將軍華玠散宗室吳
爾琿等往博羅和碩駐劄諸路兵馬俱令于四
月杪啟行九月入口飼馬自阿什罕站起至索
羅木置十五站站各置馬二十匹自索羅木傍

通柴達木路置五站站各置馬十五匹每站撥
固原綠旗兵各十人青海兵各十人又據策旺
諾爾布報若調青海兵六百于軍營附近駐劄
則于巡守並汎界差遣一切尤便乃令青海首
領于所部兩翼各撥兵三百蘭州所餘護軍一
百二十九人馬兵八百七十一人悉富西寧駐
劄議政大臣等議曰現今調兵出口駐劄汎界
巡守事甚要應令所調青海兵六百于汎界處

不時防守仍令聲言大兵即日進勦奏入

上從之

庚申

命靖逆將軍富寧安振武將軍傅爾丹即軍中自授章
京等官

富寧安疏言現今用兵之地西安察哈爾旗下
員缺請于從征官兵中按其資格並素有勞績
及人材勇健勝鈴束之任者具名舉報與內地

職官一並入奏議政大臣等議如所請奏入得旨朕曾有旨此次大兵在外如遇章京並護軍校驍騎校缺出令大將軍即行補授今若照富寧安所奏出兵地方所出之缺又將軍前人等與內地之人一併開列具奏必致重複富寧安傅爾丹兩路軍中所出官員之缺將出征之官兵內所有應陞及人材勇健善于鈐束素有勞績之人令富寧安傅爾丹等即行遴選補授俟事竣之後再補行引見如外省駐防官

缺出仍將在內人等題補

壬戌

增哈密及巴里坤驛馬

靖逆將軍富寧安疏言自巴里坤至哈密每站
並設馬匹哈密以外自塔勒納沁起至布隆吉
爾中間伊托特巴勒楚特等十處並戈壁每站
遇事輒用駱駝傳送前者策妄阿喇布坦部人
來投及彼部遣使人至京輒先以巴里坤站馬

送至哈密又自額敏撥馬送至布隆吉爾始乘
驛馬至京自今來投順者衆或彼部之使再來
巴里坤驛馬及額敏馬必不足供請令甘肅巡
撫綽奇于預備設站馬匹中撥一百三十匹巴
里坤站益馬五十哈密站益馬八十不得以應
他務止以給自策妄阿喇布坦處來歸者及其
使人乘騎議政大臣等議如所請奏入

上從之

五月癸未

命振武將軍公傅爾丹子軍前量撤官兵

傅爾丹等疏言據巴林多羅郡王額駙吳爾袞等言內地扎薩克官兵各備米糧牛羊馬匹至軍一年以後月給官兵羊兩隻予銀一兩跟役羊一隻予銀五錢現今羊價騰貴所給不足供食用請自今內地扎薩克官兵及跟役當給羊一隻者以銀一兩給之其喀喇沁兵一千歸化

城土默特兵一千及土默特種地兵一千當得
羊價亦視此支給議政大臣等議曰將軍傅爾
丹等軍前現增發黑龍江等處兵三千今兵暫
止不進當于滿洲蒙古綠旗官兵中簡其殘弱
老病者遣歸千餘以其餉量給蒙古兵丁奏入
上從之是秋八月傅爾丹疏言臣等遵

旨簡右衛索倫等處官一百一十人兵丁二千一百六
十八人並老病應遣還至効力來軍原任副都

統常關保等六十八人悉老有疾亦應遣還台
吉蘇克都爾所屬十一佐領中司屯種官二人
撥什庫甲兵七十八人應遣還令于驛站行走
兵丁還者其行月糧及羊價悉增給內地二十
三部扎薩克並喀喇沁及種地土默特兵跟役
數尚不足請每月增銀六千兩每給羊一隻以
銀一兩與之議政大臣等議覆悉如所請奏入

上從之

辛卯

定西吉木等處疆界

差往西吉木等三處定設疆界理藩院員外郎
巴福壽疏言臣傳集厄魯特貝子阿喇卜坦並
其所屬台吉阿爾薩郎及貝勒額爾德尼額爾
克所屬宰桑庫魯克貝子車臣所屬護衛車臣
藏布等會同西吉木等三處官示以設立疆界
情狀據貝子阿喇卜坦等云青海人等荷

聖主恩甚厚何惜隙地地可耕者聽兵民悉耕之但留我等游牧處所足矣臣案西吉木等三處故為西喇郭勒蒙古部人游牧所在兵民先已耕種其隙地令蒙古人等游牧如故達里圖地有車臣貝勒屬人與兵民依水道相雜耕種以西吉木水源並淖泥草墩地不可耕蒙古人等游牧其間循水而下則兵民與貝勒額爾德尼額爾克及貝子阿喇卜坦等屬人悉在兩岸交錯種

地臣即會同所司並台吉宰桑等令于交錯耕種處立界不得逾越議政大臣等議令巴福壽以所設之疆界交明巡撫綽奇而還奏入

上從之

六月甲辰

命靖逆將軍富寧安振武將軍傅爾丹預備明年進兵
傅爾丹等疏言臣等遵

旨遣貝勒丹津多爾濟等往與將軍富寧安等議巴里

坤並阿爾台兩路官兵馬畜軍器口糧俱已足
用今年可進兵襲擊但今已使人到策妄阿喇
布坦處俟使者還如策妄阿喇布坦仍前飾詞
推托來年即令兩路兵進勦今歲可暫停襲擊
兵議政大臣等議曰兩路兵馬駐劄有年前歲
軍未深入今年雖遣使臣往宜乘馬肥士集會
議襲擊但歲候已遲應停襲擊兵令兩路將軍
預備來年進勦奏入

上從之

丁未

四川總督年羹堯護軍統領噶爾弼奏報西藏

軍情

年羹堯疏言近者偵西藏諸部落以貝勒達顏
病故人人有相吞併意又聞策零敦多卜現今
左哨頭目春丕勒率兵六百餘過喀喇烏蘆河
往青海又聞發兵八千來藏已至葉爾羌克勒

底雅臣思自藏至打箭爐南路險遠北路平近
里塘現駐大兵南路可以無虞惟北路宜預為
之防臣等已調兵防守中渡河口又酌調提標
兵丁于打箭爐附近駐劄防守霍耳一路尋年
羹堯噶爾弼又疏報偵策零敦多卜率兵六千
止二千為準噶爾部人餘悉脅之俱來者且其
同將兵三濟舉動輕躁與策零敦多卜不和其
一鄂莽喇嘛即策零敦多卜之弟也臣等遙揣

賊情策零敦多卜深知策妄阿喇布坦殘忍又
與三濟不和懼不自保近者調夫修築布達拉
城池其意欲得為藏王即率衆歸附矣臣以為
可密諭策零敦多卜速來歸順使守西藏令除
三濟以自効奏入報

聞

丁巳

都統法喇奏報平里塘進撫巴塘

法喇等疏言臣等遵

旨令副將岳鍾琪率綠旗兵先行臣親率滿洲兵至打
箭爐據副將岳鍾琪等云一至里塘即傳集達
瓦喇木扎木巴第巴塞卜騰阿住等且撫之若
等支吾抗拒不肖獻其戶籍即擒達瓦喇木扎
木巴第巴塞卜騰阿住及其從人以來臣等即
數其窺探我師之罪恐遲則滋事不俟奏請已
取其七人以軍法誅之撫慰里塘所屬並宣示

巴爾喀木處復令副將岳鍾琪率綠旗兵一千
進取巴塘議政大臣等議曰都統法喇統兵招
撫巴塘受撫之後即駐其地防守不可不增兵
策應請令護軍統領噶爾弼及總督年羹堯于
現駐打箭爐滿洲綠旗兵中選調益法喇軍于
成都滿洲兵中撥往打箭爐駐劄巴塘與雲南
中甸相近請令都統武格領探準噶爾消息率
兵接應松潘與打箭爐相近請令副都統寧古

禮等亦偵探準噶爾消息率兵援應奏入

上從之尋年羹堯噶爾弼疏言據副將岳鍾琪等報里塘就撫後即遣人至巴塘招撫及率兵行至巴塘所屬立登三木巴地過前遣往招撫之人率領喀木布第巴所遣之人來歸已受之更令喀木布第巴書其所屬戶口人數俟大兵到巴塘獻之議政大臣等議覆曰巴塘既已就撫應令都統法喇仍駐劄巴塘防守奏入

上從之是秋年羹堯噶爾弼又疏言據遣往巴塘知府
遲維德等報乍了察木多察哇三處胡土克圖
羅布藏那木扎爾等欲歸順舉其所屬喇嘛民
人戶口來獻即遣郎中鄂賴遊擊黃喜林等持
銀牌茶緞輕騎前赴三處撫諭犒賞更令詳察
三處形勢還報議政大臣等議今年羹堯等俟
郎中鄂賴等還即以彼處情形及所得一切消
息奏

聞奏入

上從之年美堯噶爾弼又疏言前議政大臣等議令于

駐劄打箭爐滿兵中選撥益法喇軍及發成都

滿兵駐打箭爐今里塘巴塘並投順而乍了察

木多察哇亦相繼來歸里塘巴塘現今所駐滿

漢兵二千七百且偵探賊兵一無消息請停調

撥原駐打箭爐滿兵議政大臣等議如所請

奏入報

聞

秋七月癸酉

命都統武格議駐赴滇滿兵

武格等疏言江寧兵已抵沅州沅州地狹不可
久駐遂以湖南湖北雲南貴州諸營馬先給江
寧兵四千九十八匹前鋒自為一起八旗官兵
為四起令副都統吳納哈率之赴雲南俟浙江
兵到亦視此行令副都統噶什率之赴雲南臣

等即馳至雲南詳視駐兵形勝處及如何安置
兵馬再入奏議政大臣等議曰請令都統武格
俟兵馬悉到與所在有司集議于附近雲南形
勝處酌定駐劄仍以時偵探準噶爾消息令其
策應法喇奏入

上從之

九月乙未

命封新瑚畢勒罕為達賴喇嘛以兵送至西藏

先是大將軍允禔疏言扎穆揚善木巴等自西藏來歸公策旺諾爾布等送之至西寧詢扎穆揚善木巴等云策零敦多卜三濟等領兵駐藏聞三濟將于三月間還策妄阿喇布坦處再策零敦多卜聞大兵分路進剿恐不能支欲于五月間逃歸奏入報

聞至是

上諭議政大臣等曰此次差往西邊瑚必圖等前來回


稱策零敦多卜等及土伯特衆喇嘛民人俱言在西
寧見有新瑚畢勒罕實係達賴喇嘛之瑚畢勒罕天
朝聖主將新瑚畢勒罕安置在達賴喇嘛禪榻上座
廣施法教實與衆人相望之意允協且土伯特處時
有瘴氣厄魯特之子孫不能滋生多生疾病有何貪
戀之處惟懇天朝聖主將法教速為廣施觀此情形
似易結局今將新瑚畢勒罕封為達賴喇嘛給與印
冊于明年青草發時送往藏地令登達賴喇嘛之座

送往時著大臣帶滿洲兵一千名蒙古兵一千名土
番兵二千名綠旗馬兵一千名步兵一千名前去其
行糧牲畜接續之處令大將軍辦理再由巴爾喀木
帶四川滿洲兵一千名綠旗兵一千名土番兵酌量
派往其行糧牲畜接續之處今年羹堯辦理青海王
貝勒貝子公等亦帶領屬兵或一萬或五六十送往
前去策零敦多卜等若實為法教自必俟達賴喇嘛
登禪榻後然後前去若不行等候遁去即為無耻之

賊此行大將軍帶領兵馬在梭羅木週圍水草佳處
駐劄兼令其照管青海家屬四川兵二千名出口駐
劄兼照管王察罕丹津行裝事關甚大將此旨傳諭
大將軍處令伊等公同確議具奏又青海王台吉等
令大將軍傳集一處曉諭唐古忒國內達賴喇嘛班
臣法教原係爾祖上設立今策妄阿喇布坦無故將
拉藏殺害令寺內喇嘛各自散去將衆鄂里格一路
截斷令達賴喇嘛禪榻空虛從前爾將此新瑚畢勒

罕稱為達賴喇嘛之瑚畢勒罕若安置在達賴喇嘛
禪榻為法教廣施之事我等願捨命効力業經保奏
土伯特之喇嘛民人及阿木島地方喇嘛等俱亦稱
為達賴喇嘛之瑚畢勒罕皇上將此瑚畢勒罕特封
為達賴喇嘛于明年一同送往藏地令登禪榻將法
教廣施放開衆鄂里格一路令其販賣茶布此正宜
効力之時爾等應各帶兵丁與送去之大臣會同一
處前去爾等之意如何令伊等各陳已意會盟畫一

具奏俟會盟完時令都統延信楚宗公策旺諾爾布
侍讀學士常授等由固關來京具奏



平定準噶爾方略前編卷六

欽定四庫全書

史部

平定津嘴爾方略前編卷七十三

詳校官監察御史臣孫家賢

通政使司副使臣莫瞻菴覆勘

總校官進士臣朱 鈐

校對官中書臣李斯咏

謄錄監生臣李亭植

欽定四庫全書

平定準噶爾方略前編卷七

康熙五十八年冬十月丙寅

訓飭議政大臣

先是督理軍餉侍郎敦稗疏言臣等於康熙五十六年八月中收都統圖思海等先後運到米五萬五百石已散給官兵一萬七千二百五十餘石存米一萬三千二百四十餘石足支八月

但道遠不可不預為儲備請明年仍輓送如故
靖逆將軍富寧安復疏言都爾博勒津歷年所
收穀令滿洲蒙古綠旗官兵自運至軍圖古里
克官種所收穀用駱駝以次運至軍並未支用
正帑今主事達理等捐種青稞一千八百餘石
當自輓運至軍乃止送哈密復動支帑銀七千
二百餘兩始運至營請令侍郎海壽責達理等
如數繳納富寧安又疏言自哈密至巴里坤今

已成通衢當減自哈密輓糧至軍腳價計糧一
石減銀五錢額敏在塔勒沁所種青稞輓送
哈密計一石減銀三錢自哈密輓運至營計一
石減銀五錢凡減銀四千四百兩有奇今當給
銀三萬九百兩有奇請令甘肅巡撫綽奇如數
速解令侍郎海壽運哈密所貯糧及額敏於塔
勒納沁所種青稞至軍其在圖古里克諸處捐
種人等應納穀令侍郎海壽使人自輓運至軍

議政大臣議悉如所請至是

上諭議政大臣等曰爾等皆係議政大臣凡議政諸事並不留心俱草率議奏聞自備運米人員親身並未前往將官駝所運米石以為本身運到竟邀議叙自備種地人員並未種地交糧而管理種地之人希圖利益捏稱交糧入倉亦邀議叙現今倉內米石已致缺乏所以侍郎敦稔等奏請明歲運米應作速運到以補缺乏爾等於諸事不甚留心草率議奏之處朕

已屢降諭旨嗣後爾等須加意恪遵

十二月丙辰

命議政大臣及大將軍等詳議進藏軍務

議政大臣軍前召至大臣九卿等集議進藏一

序奏入得

旨此議尚未周詳只議西地進兵並未議及阿爾台巴
里坤兩路之兵兩路兵會合取吐魯番若烏魯木齊
難以堵塞看守應將兩路之兵會合襲擊或各減騎

進入震懾從呼爾達爾之處襲擊則彼必畏懼自然
棄此牧放牲畜之處而去再聞知西地大兵進勦並
兩路兵襲擊不但驚惶無措亦且首尾不能相顧矣
額駙阿寶所屬厄魯特兵五百名察哈爾兵四百名
令帶往取藏此柴達木所有之兵亦令前往取藏大
將軍留駐穆魯烏蘇三千兵內令派兵一千前進大
將軍處之兵若少將京師每佐領下派出護軍二名
馬兵一名於二月內起程前往西寧今新瑚畢勒罕

奏稱各處俱有禪牀皆可安設若為我興兵實關係
衆生此或是新瑚畢勒罕之意或是青海台吉等畏
懼策妄阿喇布坦密囑新瑚畢勒罕奏亦難預知倘
新瑚畢勒罕與青海台吉等意同此新瑚畢勒罕不
可往送青海台吉等若無此意必將新瑚畢勒罕送
往安設禪牀廣施法教令土伯特之衆誠心歸向則
策零敦多卜自畏勢逃遁我師進藏定立法教之後
或留兵一二千暫行看守或久住則土伯特之衆即

如我兵縱策妄阿喇布坦策零敦多卜發兵前來伊
係勞苦之兵我則安逸之兵即可勦滅朕意如此事
關重大不可急迫從容周詳定議為是今若照衆大
臣議惟行看守自西寧至四川雲南內外土番雜居
一處西藏之人皆係土番伊等俱是一類倘藏地被
策零敦多卜占據則藏兵即是彼之兵丁而邊疆土
番豈能保全爾等暫且看守之議不合著另行周詳
定議具奏尋議覆曰護送新瑚畢勒罕兵止八千勢

稍弱當益兵四千令額駙阿寶親率厄爾特兵
五百副都統常齡率察哈爾兵四百更於柴達
木駐防都統阿爾納所屬兵二千中撥千五百
人令侍衛阿齊圖等率之大將軍留駐穆魯烏
蘇兵三千中撥兵千六百人與俱凡兵萬二千
遣大臣一人授以將軍印勅令統諸軍進發封
新瑚畢勒罕為達賴喇嘛應給印勅名號令所
司議奏都統延信楚宗公策旺諾爾布侍讀學

士常授等還時令與大將軍集議青海台吉等
若誠心護送即令新瑚畢勒罕與馬兵同發若
必俟事定日送往令暫居滾穆布木廟中先遣
大兵攻取藏地令阿寶所領兵五百及察哈爾
兵四百滿漢兵二千青海兵二千並駐劄防守
更令都統法喇等酌量統兵由巴爾喀木一路
進令噶爾弼年羹堯撥兵二千赴法喇軍於都
統武格所統兵中選滿兵一千綠旗兵二千滿

兵令都統武格副都統吳訥哈統之綠旗兵令
總兵官趙坤馬會伯統之與法喇軍會軍當於
何日發及會於何地令大將軍檄諸軍定奪更
於阿爾台三萬兵中選兵一萬五千令持三月
糧於六月杪自布拉罕布魯爾兩路進若策妄
阿喇布坦無備即深入襲擊若彼覺之即引兵
還於巴里坤一萬三千兵中選兵一萬令三千
人輕騎襲吐魯番二千輕騎襲擊烏魯木齊餘

兵五千徐徐前進令於襲擊烏魯木齊軍後策
應軍中人悉持二月糧於七月初與阿爾台兵
約期同進其襲擊兵及駐劄兵當以何人統之
進藏兵於軍前諸大臣中以何人為將軍及西
寧等處提督總兵官中遣何人往伏候

諭旨奏入得

旨此議甚詳事務關係重大著行令大將軍等與青海
台吉等公同定議具奏

戊午

運大同府倉米一萬石至軍

山西巡撫蘇克濟疏言兵部行文來年仍運瑚
坦和碩米一萬石至軍臣按往者運米至大同
購募夫車赴瑚坦和碩所需駱駝及鞍屨等物
費銀萬餘若以大同府大有倉所貯米由得勝
路輓運道里既近且省夫車之費議政大臣等
議如所請奏入

上從之

己未

都爾伯特固山貝子阿金率以其子巴圖襲爵

庚申

調古北口宣化二鎮兵赴西寧

上諭議政大臣等曰古北口宣化二鎮兵丁壯健著每處各派兵五百名發往西寧爾等議奏尋議曰令古北宣化二鎮各撥兵五百古北口兵令副將韓

良輔率之宣化兵令副將陳棟率之並於二月
啟行赴西寧奏入

上從之

辛酉

蠲免陝西沿邊州縣衛所來年田賦

上諭戶部曰朕惟治天下之要務首以乂安民生為先
故自御極以來於閭閻疾苦無不博諮廣詢渙敷庥
澤其有動民力之處尤惻然軫念刻不能忘蓋六十

年如一日也。比年因策妄阿喇布坦狂逞跳梁興兵征勦遠厯邊陲其沿邊數處師旅屯駐一切雖皆支用正項錢糧而協辦轉輸行齎運送之事民力勞瘁朕心時切憫念曾將陝西甘肅所屬康熙五十八年額徵地丁銀一百八十八萬兩零厯年舊欠銀四萬兩零特沛恩綸悉行蠲免而沿邊各州縣衛所軍行既多飛輓之勞辦賦復滋催科之擾若非格外加恩小民恐致失業所有沿邊一帶陝西所屬府谷神木

安塞綏德米脂安定吳堡保安榆林保寧常樂雙山
魚河歸德響水波羅懷遠威武清平葭州龍川鎮靖
鎮羅寧塞靖邊柳樹澗安邊磚井定邊饒陽水堡高
家堡甘肅所屬山丹高臺古浪莊浪西寧肅鎮寧夏
左屯中屯平羅中衛靈州寧州平涼衛固原州鎮戎
西安阜城甜水河州蘭州洮州寧夏前衛平涼縣固
原衛河州衛蘭州衛慶陽涼州衛永昌衛鎮番衛甘
州左衛右衛肅州衛鎮彝所等六十六州縣衛所堡

康熙五十九年錢糧米豆草束俱宜蠲免但目今係
有軍務之時除米豆草束外將康熙五十九年額徵
銀九萬八千一百兩零盡行蠲免爾部行文該督撫
通行曉諭實心奉行務俾均沾德惠以副朕曲軫邊
民之至意倘或借端科派澤不下究該督撫嚴察指
叅從重治罪爾部即遵諭行

壬戌

撥在京滿洲兵赴西寧

議政大臣等遵

旨議奏京城滿洲兵每佐領撥烏鎗護軍一名護軍一
名烏鎗馬兵一名以護軍統領一人副都統二
人領之每旗遣護軍叅領一人每翼遣烏鎗護
軍叅領一人驍騎營所屬火器營各遣叅領一
人為長即赴西寧所遣大臣等官給五年俸兵
丁給二年錢糧驍騎營兵為一隊以副都統一
人領之護軍為一隊以護軍統領一人副都統

一人領之悉於明歲二月啟行再前者令山西大同平陽等處綠旗步兵一千在甘州備調今發兵萬二千人進藏明年若送達賴喇嘛登禪榻卽令甘州兵一千前赴防衛奏入

上從之

康熙五十九年春正月壬申

誥諭滿漢大臣

上諭議政大臣等曰

太祖

太宗時滿洲兵凡遇征戰馬匹口糧自備行走所向立功並無遲悞今官兵行走處馬匹口糧器械等俱給帑置辦且以為不足而怨咨生焉此皆由該管官不行嚴飭之故也朕辦理軍務閱歷甚多向時攻取岳州但從陸路抵禦許久不克朕諭令於洞庭湖務備船隻以水路遏賊貝勒察尼奏湖中風浪甚大船不能行恐有礙於兵丁請撤戰船朕諭以岳州城已被

困不久即下若將戰船撤回賊得由水道往來何能有得岳州之期哉於是不撤船兵嚴飭看守未幾而岳州下矣再征討雲南時滿漢官兵合計四十餘萬貝子章泰等離雲南城四十里安營一面臨湖一面抵山並未設兵湖中斷其水路致賊寇米糧照舊運行城內並無危急後趙良棟率寧夏兵至云我等大兵連營四布不就近連戰迨至日久米糧不繼滿兵無妨綠旗兵何以存立耶章泰云皇上豢養之滿洲

豈可輕進委之於敵且爾兵遠來亦宜休養何可令其傷損趙良棟不從章泰之言自率標兵前往力戰奪取得勝橋而趙良棟之兵亦瘁甚矣章泰又向趙良棟云爾兵已瘁應暫撤回令總督蔡毓榮率兵看守趙良棟云我死戰所得之地肯交與他人看守乎因此章泰亦進軍圍城賊兵被逼而出在桂花寺地方與我兵接戰大敗之吳世璠等倉皇失措無所逃匿乃自殺餘賊獻城投降此亦由決於進戰乃得成

功也再出征烏蘭布通時阿密達因天晚撤兵云皇
上必不以撤兵故遂殺我等將兵撤退索額圖明珠
選勇士數百人近身防護勇士云挑選我輩原擬或
戰或追詎意止令防護共生忿怨後中路出兵時令
大臣官員等會議進兵之處衆皆謂不可獨朕與費
揚古以兵為可進決意進兵及至科圖地方衆皆不
欲前發大臣等勸朕撤兵朕諭以祭告

天

地

太廟

社稷親統兵前來不見賊踪如何驟行撤去不允所請
將兵前進噶爾丹聞我兵威甚是驚懼鼠竄而去朕
選兵令馬思喀為將軍尾追噶爾丹又遇西路兵攻
擊大敗之朕將中路初次運到之米遣明珠速送至
費揚古軍前二次米亦即令續送三次米內朕但留
十八日口糧餘俱送西路軍前是以西路兵丁未至

饑饉得保全而回彼時若輕信大臣等言中道撤兵則兩路兵丁安得立功奏凱耶今觀領兵大臣官員等祇為保身之計不以國事為重內存私意彼此爭論不和又向兵丁等沽名市恩多取口糧及不能馱載至於拋棄全無珍惜之意如此居心行事可乎朕之滿洲兵俱極精練全在領兵者將國家之事專心辦理不圖安逸賞罰嚴明則斷無錯悞進兵西藏時色楞不候衆人獨自前往額倫特亦隨後追至為國

家奮不顧身雖至失機豈可論伊等進兵太速乎今
策旺諾爾布係差往策應之兵而遲延不前雖伊所
統兵丁善全而歸伊屬下之兵固然感念於國事有
何裨益惟西路陣亡兵丁朕甚為憐憫當分別加恩
至大臣官員等在部院衙門亦能清廉自守若行軍
大事又非僅清廉自守者能勝任也朕年少時每於
講武練兵等事違命者必懲以法內外大小悉知儆
惕由此觀之訓練之事不可疎忽也茲衆喀爾喀及

青海等俱服朕之風化而策妄阿喇布坦之人霸占藏地毀其寺廟散其番僧青海台吉理應棄命忘身奮勇致討乃伊等口稱維持黃教却無實心効力之人策零敦多卜領兵在藏以我兵隔遠不能往救朕思伊等兵步行一年有餘忍饑帶餒尚能到藏我兵顧不能至乎今滿漢大臣咸謂不必進兵朕思此時不進兵安藏賊寇無所忌憚或煽惑沿邊諸番部將作何處置耶故特諭爾等安藏大兵決宜前進

臣等謹按夏后恭行天罰實賞用命文王赫怒整旅以篤周祜夫命之所出決之一心而其祜及於世世聖人所稱我戰則克者也伏覩我

聖祖仁皇帝於西藏之役既命將軍等出師擊賊至是復

諭中外大臣以決策進兵之意詳舉下岳州討雲南征烏蘭布通及中路進兵一切大功之成並由

獨斷且申言色楞額倫特等之力戰可嘉而策旺諾爾布之遲緩全師為無益於事洋洋聖謨所以作三軍之氣而為萬世長久之計者何其至也於時自六月出師以後八月甲辰將軍富寧安以擒賊之台吉垂木拍爾聞癸亥將軍祁里德以降其宰桑塞卜騰等聞甲子富寧安又以收闡展城及吐魯番部聞九月壬午將軍傅爾丹以擒賊之宰桑貝肯等聞十月

庚戌將軍噶爾弼奏克西藏乙卯撫遠大將
軍允禔亦奏將軍延信敗賊入藏揆厥所由
惟我

聖祖先幾默運既命靖逆將軍富寧安振武將軍傅爾
丹征西將軍祁里德分軍三道並進以擊策
妄阿喇布坦邊境令賊驚擾首尾不能自顧
然後定西將軍噶爾弼一軍自拉里入平逆
將軍延信一軍自青海入不數月間克有藏

地收復疆圍式廓旼章成功之捷為自古所未有夫藏地西直厄爾特南帶諸番形勢互為犄角固勝算所必爭由是而平青海戡準夷定回部恭逢

今日肅清西極之閔規實啟於此而推溯當年用兵始末則

廟謨之神速

貽謀之宏遠不皆於此可覩歟

丁酉

命撫遠大將軍允禩率前鋒統領弘曙移駐穆魯烏蘇
管理進藏軍務糧餉

授都統宗室延信為平逆將軍率兵進藏以公策旺諾
爾布副都統阿琳寶額駙阿寶隨印侍讀學士
常授提督馬見伯總兵官李麟參贊軍務

調西安將軍宗扎卜駐防西寧平郡王訥爾素駐防古
木等地

調出征和碩裕親王保泰子廣善和碩簡親王雅爾江
阿子永謙固山貝子魯賓護國將軍敬順回京
准原任西安將軍席柱赴軍効力

席柱呈請自備鞍馬赴軍前戴罪効力議政大
臣等議如所請發往阿爾台軍前効力奏入
上從之

二月癸丑

以護軍統領噶爾弼為定西將軍

上諭大學士等曰總督年羹堯自軍興以來盡心効力
訓練川兵甚是整齊可速行文與年羹堯令伊帶領
兵丁進藏授為將軍如有能署理總督事務於地方
不致生事者今年羹堯奏聞署理如地方緊要不得
署理之人著護軍統領噶爾弼為將軍帶領雲南四
川兩處兵馬前進定西將軍印速行送往尋年羹堯
奏言四川總督印務一時無可署理者請授噶
爾弼為定西將軍給以印信令率兵進藏并調

都統法喇於射箭爐駐劄防守奏

上從之

命封新瑚畢勒罕為弘法覺衆第六世達賴喇嘛遣兵
送往西藏

先是撫遠大將軍允禩奏言臣遵

旨傳集青海王台吉等議進兵及送新瑚畢勒罕往藏
青海王台吉等皆同心協力願率兵從征并請
封新瑚畢勒罕護持黃教至是

命封新珣畢勒罕為弘法覺衆第六世達賴喇嘛發滿
漢及青海兵送之西行其四十九旗扎薩克及
喀爾喀哲卜尊丹巴胡土克圖等亦令遣使護
送

三月己丑

雲南都統武格奏報率兵赴藏

都統武格疏言雲南一路滿漢官兵奉調赴巴
爾喀木與將軍噶爾弼合兵進藏臣等於二月

十二日自雲南啟行又麗江土知府木興請出兵効力臣選其土兵五百令木興之子率之從
征奏入報

聞

丙申

靖逆將軍富寧安征西將軍祁里德奏報分路
進兵

富寧安疏言今歲議發大兵進勦西藏其阿爾

台巴里坤兩路兵亦相約進擊準噶爾邊境令
賊擾亂可以相機行事臣請率兵三千自烏魯
木齊路進分兵四千自吐魯番路進其領兵大
臣請

旨命往又兩路進兵後請更發兵三千策應餘兵留者
暫令副都統雅圖侍郎海壽等管轄奏入得
旨令議政大臣等議奏尋議應如所奏其分路襲擊吐
魯番兵令散秩大臣阿喇衲率之進發奏入

上從之祁里德疏言臣請將阿爾台路兵七千由布魯爾路進將軍傅爾丹將八千人由布拉罕路進襲擊準噶爾邊境餘兵請更遣大臣統轄奏入得

旨令議政大臣等議奏尋議應如所奏其兵留者應令將軍顏壽都統穆賽等統轄擇形勝地駐劄奏入

上從之

夏四月壬寅

以巴塘里塘暫歸四川省管轄

四川總督年羹堯疏言近者雲貴督臣蔣陳錫請以巴塘里塘地歸麗江土知府管轄臣按巴塘里塘舊為西藏侵據臣宣示

聖主恩威招撫投順雖歸蜀歸滇莫非王土但四川現值用兵一切運糧調遣道經巴塘里塘地關扼要撥歸土司則呼之不應移文滇省則往返遲

延請仍歸四川管轄以利軍行又都統武格移文云雲南進藏兵當接運三月口糧山高路狹難以輓運請以四川所運米支給按今滇蜀兩省並進兵而蜀省發兵七千滇省發兵三千多寡相懸恐蜀省所運米不足供滇省用議政大臣等議曰應如年羹堯所奏令雲南督撫速運米以濟雲南兵如武格等所領兵已與噶爾弼軍會或雲南運米未到暫撥四川餘糧支給即

以雲南所運米如數補還其巴塘里塘地當暫
歸四川統轄俟竣事日如原議改隸雲南奏入
上從之

丙寅

命靖逆將軍富寧安即軍中簡署副都統管轄駐營滿
洲兵

富寧安疏言巴里坤現駐西安滿洲兵二千八
百令都統晏布副都統鄧其章統轄晏布雖大

臣西安非其所轄鄧其章為漢軍副都統事竣
後兵丁還西安不知孰為有功孰為無功至未
親行陣者更或濫舉邀賞請於西安滿洲協領
中每翼以一人委署副都統稽察可杜一切弊
竇如蒙

俞允請於軍中西安滿洲協領中選列銜名候

旨簡用奏入得

旨令議政大臣等議奏尋議應如所請西安滿洲兵應

以西安滿洲協領委署副都統轄之即令富寧
安選委奏入

上從之

五月辛巳

命議政大臣等行文傳

諭各路將軍

上諭議政大臣等曰今歲稍旱應速行文與各路將軍
或營中亢旱馬匹未肥或進兵之路甚旱水草不敷

俱未可定勿謂既經議定進兵不敢復以亢旱為辭
奏請停止朕念軍務所關甚大從前屢諭爾等及領
兵大臣凡軍機之事有今日定議明日又改者未可
拘執要在相其機變而行朕於用兵之事必熟思而
後頒發旨意若無旨意又恐軍中之大臣難以奉行
也然軍中或因亢旱而無水草馬匹倒斃則兵丁如
何前進如何回旋明年又如何進兵耶總之雨水及
時牧草果好前進自無艱阻應即行進兵倘或亢旱

馬匹疲瘦雨水不調牧草不堪則即以不宜進兵之處令軍中之大臣等定議具奏斷不可以今歲若不進兵來年亦可再進作游移之語陳奏也路途遙遠恐發去文書遲延遺失亦未可定須於明日行文一次續後再行文一次有一處不可進兵即著將此處奏請停止

壬申

命調右衛副都統覺羅圖喇參贊振武將軍傅爾丹軍

務

以征西將軍祁里德軍前副都統穆克登署前
鋒統領事

戊寅

以成都徵糧支給駐防滿洲兵月米

年羹堯疏言向例蜀省兵米以銀抵給聽兵自
購今成都駐防滿洲兵需米甚多年歲豐歉不
一恐一時買食增值請令成都近地州縣有水

路者田糧勿以銀代悉令輸米酌給運費載赴
成都作滿洲兵月米議政大臣等議如所請奏

入

上從之

六月癸卯

靖逆將軍富寧安等奏報進兵日期

靖逆將軍富寧安振武將軍傅爾丹征西將軍
祁里德疏報巴里坤阿爾台兩路駐兵之處雨

水調和兵馬騰壯又偵探沿途並有水草當如
原議進擊賊境巴里坤兵於七月初一日啟行
阿爾台兵於六月十六日啟行奏入報

聞

秋七月乙亥

命漕運總督施世綸赴陝西勘視黃河運道

上諭大學士等曰朕先巡幸陝西曾問黃河水路由河
南通至陝西之處地方官回奏不能行走朕思上古

大禹鑿龍門通濬水道漢唐之時俱經輓運豈有不
能行船之理故特遣皇子允祉往勘允祉乘騎渡黃
河至砥柱龍門查看竟可行船由龍門至黃河直通
渭河可至西安北門從絳州汾河可至山西太原彼
時山西陝西河南將軍督撫等亦曾令會看今總漕
施世綸居官素優歷年漕船俱催趲全完並無遲悞
本年漕船已經過淮更無他事漕運印務著暫交與
總河趙世顯署理施世綸速赴豫省將河南府至西

安黃河輓運路徑勘明具奏陝西現存穀石數目亦著查奏今陝西正值軍需之際施世綸暫留陝西令協同鄂海辦理糧餉事務

八月甲辰

靖逆將軍富寧安奏報敗賊擒其首都爾伯特
台吉垂木拍爾

富寧安疏言臣於七月初一日率襲擊兵七千
啟行初二日駐度集選精兵一千輕騎趨烏爾

圖畫伏夜行初六日黎明兵抵烏蘭烏蘇之源
及烏蘭烏蘇口托和木圖諸處悉無賊哨四向
搜捕亦無踪跡初七日駐兵烏蘭烏蘇口內比
暮令一等侍衛哲爾德等率兵赴阿克塔斯二
等侍衛克什圖一等侍衛阿玉錫等率兵赴伊
勒布爾和碩分擊賊哨頻行時臣密囑哲爾德
等烏蘭烏蘇與阿克塔斯相距七十里與伊勒
布爾和碩相距百餘里爾等至阿克塔斯近地

潛兵以待度克什圖兵已至伊勒布爾和碩即發兵合擊之慎勿急進令賊人覺又與克什圖等約令沿戈壁邊界進兵於天未明時即抵伊勒布爾和碩圍擊賊哨臣率署前鋒統領法璫副都統常壽等繼進初八日侍衛哲爾德等擊阿克塔斯賊哨賊懼甚望風走我師急追之獲一賊餘入深山潰散侍衛克什圖等擊伊勒布爾和碩賊哨見賊有馬在谷中阿玉錫率十餘

騎入谷奪賊馬百餘匹而還賊以我兵掩至據
高山險絕處藏身樹石間發鎗抵拒克什圖等
率兵奮擊阿玉錫衝入賊中手刃三人我兵殺
賊三十餘人生擒二十四人所獲馬匹器械臣
即以分犒官兵奮勇者擒獲賊首都爾伯特台
吉垂木拍爾以身負重傷暫送巴里坤副都統
雅圖營俟師還即檻送垂木拍爾至京餘賊檻
送與否請

旨定奪奏入得

旨將軍富寧安圍擊賊哨生擒賊二十餘人著行文副都統雅圖派兵送來京師沿途嚴加看守勿致逃亡其垂木拍爾暫停起解俟瘡痊愈後再行解京

癸丑

征西將軍祁里德奏報敗賊降其宰桑塞卜騰等

祁里德疏言臣率官兵進襲恐厄魯特烏梁海

等賊邀我師後路即分兵千二百人留阿保喀
卜沁防厄魯特賊人往來及索烏梁海賊人潛
伏山谷中踪跡擒厄魯特烏梁海賊四百餘人
復於七月二十九日率兵自鏗格爾河進偵厄
魯特宰桑塞卜騰等率賊衆赴鏗格爾河據山
守險臣遣人招降賊恃險拒敵我師分兩道夾
擊之賊衆大潰竄守山麓次日復遣人往宣布
聖主威德宰桑塞卜騰等率二千餘人降所獲馬駝牛

羊萬餘隻其宰桑塞卜騰等俟師還遣官兵解
送京師奏入得

旨此次擒獲之人及投降之宰桑塞卜騰等派官兵解
送時著喀爾喀協濟先送至歸化城將其中頭目數
人驛送至京其餘烏梁海之人交與公博貝等設法
護視勿致逃竄

甲子

靖逆將軍富寧安奏降賊衆及闢展城吐魯番

部

富寧安疏言散秩大臣阿喇衲等於七月初八日兵進齊克塔木遇賊兵據營擊破之擒殺二十餘人賊衆悉降初十日至闡展城有回子兵守城官兵進擊擒回部一人即遣歸令諭衆回人輩我師為征勦策妄阿喇布坦而來與爾無涉若速歸順即赦勿誅否則破城悔無及矣是日闡展城回部首長率三百餘人來降十三日

大兵至吐魯番吐魯番部阿克蘇爾坦及總管
酋目沙克扎拍爾等悉率衆降凡獲鳥鎗五百
五十桿駝四十隻馬五百匹阿喇衲等於七月
十六日率沙克扎拍爾等及官兵凱旋奏入得
旨將軍富寧安所奏著發抄京城傳諸王滿漢大臣等
公同閱看

九月壬申

靖逆將軍富寧安奏報凱旋回營

富寧安疏言臣於七月十八日至烏魯木齊不見賊哨即遣兵遍索亦無踪跡有烏魯木齊及喀什噶爾諸處逃回人先後來降詢以策妄阿喇布坦消息據言若等乃哈密屬人為賊所掠是月十一日賊目徹格爾得自伊勒布爾和碩奔還云

天兵已至台吉垂木拍爾所率兵勦殺無遺以故烏魯木齊所居垂木拍爾屬人及厄魯特衆各震駭

奔竄若等乘間逃出來降又言烏魯木齊今年
旱牲畜死者甚多臣遣人詳悉偵探與回人言
無異其阿喇衲襲擊吐魯番兵先於七月二十
四日至烏蘭烏蘇臣所領兵於八月初二日亦
至烏蘭烏蘇初三日合兵凱旋初十日抵巴里
坤奏入得

旨令議政大臣知之

戊寅

罷雲南總督蔣陳錫雲南巡撫甘國璧

蔣陳錫甘國璧奏都統武格將軍噶爾弼自察
木多啟行撥用四川雲南二省糧餉奏入得

旨蔣陳錫甘國璧皆係地方大臣雲南進藏之兵各項
糧餉應預先料理如期運送今蔣陳錫甘國璧於糧
餉之事並不留心料理幾至遲悞及大兵進藏之後
伊等方以運送米糧之事繕摺奏聞四川之米若不
到雲南之兵從何就食蔣陳錫甘國璧顯然有悞軍

機俱著革職令自備口糧運米進藏若遲悞不能抵藏即行正法其雲南貴州總督事務著貴州提督張文煥署理雲南巡撫事務著貴州布政使楊名時署理貴川提督事務著河南南陽總兵官張致署理南陽總兵官事務著河南巡撫楊宗義於本省副將內揀選一人題請署理伊等俱著速行赴任

壬午

振武將軍博爾丹奏報敗賊擒其宰桑貝肯等

傅爾丹疏言臣率兵至格爾額爾格厄魯特人
聞大兵即至委棄行帳什物四路奔潰臣等分
兵進勦於七月二十一日追及之殺賊二百餘
人擒宰桑貝肯等百餘人招降三百餘人獲馬
駃器械無算又偵知烏蘭呼濟爾為厄魯特人
屯聚耕種之所臣親率兵躡之焚其所積糧草
一空整隊而還賊尾我師來襲我師截擊之賊
大敗遁請以宰桑貝肯等檻送京師奏入得

旨將軍傅爾丹所奏著抄發京城傳諸王文武大臣公

同看閱

平定準噶爾方略前編卷七

欽定四庫全書

平定準噶爾方略前編卷八

康熙五十九年冬十月庚戌

定西將軍噶爾弼奏克西藏

噶爾弼疏言臣等率兵至拉里間春丕勒宰桑率賊兵二千六百人自章米爾戎一路來拒我師臣等議乘其不備先取墨朱工喀於八月初四日臣率兵自拉里進王師所至望風響應朱

貢之胡土克圖先獻地降次日進取墨朱工喀
賞賚第巴頭目安輯民人臣遣千總趙儒等往
諭第巴達克咱來降又喇嘛鍾科爾頭目並相
繼來降臣等即令第巴達克咱聚集皮船於八
月二十二日渡河復令侍衛訥秦等率兵分為
三隊二十三日五鼓起程進取西藏集藏中大
小第巴頭目並各寺廟喇嘛宣示

聖主拯救西藏民人至意凡達賴喇嘛倉庫悉封之於

附近要地駐營發兵固守以截準噶爾部人往來及斷其糧道頃之三廟坎布畫擒各廟所在準噶爾喇嘛凡一百一人以獻其中首惡喇嘛五人據第巴達克咱及三廟坎布等言五人者並受策零敦多卜逆命為總管即取五人斬之其喇嘛九十六人悉令拘禁奏入得

旨噶爾弼等遵朕指授率領官兵歷從古用兵未列之絕域各加奮勵克取藏地將準噶爾人等信用之逆

惡番僧五人正法撫綏唐古忒土伯特人民甚屬可嘉在事將軍以下兵丁以上俱著從優議叙

賞賚四川雲南取藏官兵

上諭兵部曰朕惟國家綏乂地方愛養兵民實係緊要朕自臨御以來夙興夜寐無時不以軍民生計為念比年策妄阿喇布坦蠢動跋扈侵我哈密殲及拉藏占取藏地騷擾土伯特唐古忒人民再吐魯番之人皆近四川雲南一帶邊境居住準噶爾人等若將吐

魯番侵取又將土伯特唐古忒人民煽惑侵犯青海不但難以應援亦且難於取藏是以調四川雲南滿漢官兵由拉里前發西路大兵由青海進藏官兵俱感朕豢養之恩遵朕指授各加奮勵直抵險遠絕域克取藏地殊堪軫念應大沛恩澤四川雲南滿漢官兵從前所領俸餉俱著免其扣取仍遣堂官將取藏之四川雲南官兵每人賞銀十兩即給本人妻子以示朕軫恤官兵勞苦之至意爾部即遵諭行

乙卯

撫遠大將軍允禩奏報平逆將軍延信敗賊進藏

允禩疏言平逆將軍延信等於八月十五日率兵駐劄布克河策零敦多卜等乘夜來犯擊敗之奪其馬匹器械十九日自卜克河進二十日駐齊諾郭勒三更賊二千餘人襲我我師嚴整禦之賊衆久持不能當遂奔北二十一日自

齊諾郭勒進二十二日次綽瑪喇是夜五更賊
兵千餘來奪營營中四面哨兵鎗礮矢石齊發
賊兵死者甚衆遁去延信等旋率滿漢官兵於
九月初八日自達穆發送新封達賴喇嘛至藏
前達賴喇嘛博克達留藏不便應遣還京師奏
入得

旨前遣大兵進藏議政大臣及九卿等俱稱藏地遙遠
路途險惡且有瘴氣不能遽至宜固守邊疆朕以準

噶爾人等現今占取藏地騷擾土伯特唐古忒人民
再吐魯番之人皆近雲南四川一帶邊境居住若將
吐魯番侵取又鼓動土伯特唐古忒人衆侵犯青海
彼時既難以應援亦且不能取藏朕決意獨斷著靖
逆將軍富寧安振武將軍傅爾丹征西將軍祁里德
管領兩路官兵前往策妄阿喇布坦邊境驚擾襲擊
又遣定西將軍噶爾弼領雲南四川滿漢官兵由拉
里前進平逆將軍延信領西路官兵由青海前進又

遣大將軍總領大兵駐劄穆魯烏蘇調遣官兵辦理糧餉卽等俱各加奮勵兩路襲擊之兵至策妄阿喇布坦邊境屢次大勝勦殺賊兵擒獲人畜招撫數千準噶爾人衆茲覽大將軍奏延信等三次將策零敦多卜殺敗賊兵逃竄殊屬可嘉在事將軍以下兵丁以上俱著從優議叙

丁巳

命大將軍等會議明年進兵勦賊

靖逆將軍富寧安疏言今歲阿爾台巴里坤兩軍襲擊策妄阿喇布坦邊境將軍延信等進兵安藏悉遵

皇上指授大振軍威賊人聞之心膽俱碎或以窘迫故遣使乞降為緩兵計臣愚以為賊性奸詭即受降不足信請乘勝於來年大舉進勦現在巴里坤及固原甘肅等處兵約萬有七千請選八千人由額林哈畢爾噶路進六千人由吐魯番阿

爾台路進各持三月糧其設置驛站令巡撫綽
奇預為料理又巴里坤草廠較勝他處一切設
臺運米及調兵所用駝馬若早驅至巴里坤牧
放三月則駝馬肥壯有益軍務其來年進兵程
期並如何策應臣再與阿爾台路大臣會議奏
聞奏入得

旨交議政大臣尋議政大臣議曰應如將軍富寧安所
奏來年大兵進勦一切軍務悉宜預備至進兵

時或直搗賊巢或扼據形勝臨期相機而行大將軍所領兵中應更撥三千益富寧安軍并令與阿爾台路將軍約如何會合進發其詳議以

聞奏入符

旨此事著行文允禩及富寧安傅爾丹祁里德等將來年進兵之處互相商酌詳加定議具奏

辛酉

罷駐守噶斯布特爾及青海兵仍以兵二千防

青海

撫遠大將軍允禩疏言八月二十三日我師進藏偵知策零敦多卜等先自克勒底雅遁請罷噶斯布特爾及青海駐守之兵議政大臣等議覆曰應如所請但策零敦多卜等狡甚雖已遁去或恐乘隙來侵擾青海應令大將軍仍撥兵二千駐劄青海附近處偵探防守奏入

上從之

金史紀事本末卷八
癸亥

預給官兵明年俸餉

靖逆將軍富寧安疏言據軍前副都統覺羅英
柱常壽提督路振聲等云明年大兵進勦一切
軍器馬匹悉應預備請借支官兵一年俸餉銀
凡三十五萬九千四百二十兩有奇於每季每
月給發俸餉時扣除如蒙

俞允乙

勅諭甘肅巡撫綽奇運送軍前如數如明年或不進兵
即留軍前備每年軍餉之用議政大臣等議如
所請奏入

上從之

十一月丙子

四川總督年羹堯奏劾麗江土知府木興
年羹堯疏言里塘巴塘為蜀省出兵運道奉

旨屬四川管轄乃雲南麗江土知府木興數遣人恐喝

巴塘所屬喇皮等處令歸雲南番人咸懼現在四川募夫陸續運米悉不敢前八月二十日木興率蠻兵至喇皮番目巴桑以已歸四川為詞木興殺之又威脅番人令之歸已以致番蠻各思搆兵巴塘之運道遂阻木興狂悖生釁殺良阻運請革職拘禁雲南俟西藏既平嚴訊擬罪議政大臣等議曰平藏大兵尚未入口年羹堯所劾木興之案請俟師旋日遣京師大臣一人

往訊奏入

上從之

辛巳

命大學士學士九卿等詳考西南徼外山川地名

上諭大學士學士九卿等曰朕於地理從幼留心凡古
今山川名號無論邊徼遐荒必詳考圖籍廣詢方言
務得其正故遣使臣至崑崙西番等處凡大江黃河
黑水金沙瀾滄諸水發源之地皆目擊詳求載入輿

圖今大兵得藏邊外諸番悉心歸化三藏阿里之地
俱入版圖其山川名號番漢異同當於此時考證明
核庶可傳信於後大概中國諸大水皆發於東南諾
莫琿烏巴西達罕內外其源委可得而縷析也黃河
之源出西寧外庫爾坤山之東衆泉渙散不可勝數
望之燦如列星蒙古謂之敖敦塔拉西番謂之索羅
木中華謂之星宿海是為河源匯為薩陵鄂陵二澤
東南行折北復東行由歸德堡積石關入蘭州岷江

之源出於黃河之西巴顏喀喇嶺齊齊爾哈納番名
岷尼雅克撮漢書所謂岷山在西徼外江水所出是
也而禹貢導江之處在今四川黃勝關外之乃褚山
古人謂江源與河源相近禹貢岷山導江乃引其流
非源也斯言實有可據其水自黃勝關流至灌縣分
數十支至新津縣復合而為一東南流至叙州府與
金沙江合流金沙江之源自達賴喇嘛東北烏尼尹
烏蘇峰流出烏尼尹烏蘇峰中華謂之乳牛山也其

水名穆魯烏蘇東南流入喀木地又經中甸入雲南
塔城關名金沙江至麗江府又名麗江至永北府會
打衝河東流經武定府入四川界至叙州府流入岷
江經夔州府入湖廣界由荊州府至武昌府與漢江
合漢江源出陝西寧羌州北蟠冢山名漾水東流至
南鄭縣為漢水入湖廣界東南流至漢陽縣漢口合
岷江此諸水在東南諾莫琿烏巴什達罕之內源發
於西番委入於中國也瀾滄江有二源一源於喀木

之格爾幾雜噶爾山名雜褚河一源於濟魯肯搭拉
名鄂母綽河二水會於察木多廟之南名拉克褚河
流入雲南境為瀾滄江南流至車里宣撫司名九龍
江流入緬國瀾滄之西為喀喇烏蘇即禹貢之黑水
今雲南所謂潞江也其水自達賴喇嘛東北哈喇淖
爾流出東南流入喀木界又東南流入怒彝界為怒
江入雲南大塘隘更名潞江南流經永昌府潞江安
撫司境入緬國潞江之西為龍川江龍川江之源從

喀木所屬春多嶺流出南流入雲南大塘隘西流為
龍川江至漢龍關入緬國此諸水在東南諾莫琿烏
巴什達罕之外皆流入南海也又雲南邊境有檳榔
江者其源發自阿里之岡底斯東達木朱喀巴卜山
譯言馬口也有泉流出為雅魯藏布江從南折東流
經藏危地至日噶公噶兒城旁合噶爾招穆倫江又
南流經公布部落地入雲南古勇州為檳榔江出鐵
壁關入緬國而岡底斯之南有山名郎干喀巴卜譯

言象口也有泉流出入馬皮木達賴又流入卽喀淖爾兩河之水西流至桑南地岡底斯之北有山名僧格喀巴卜譯言獅子口也有泉流出西行亦至桑南地二水合而南行又折東行至那克喇蘇木多地與岡底斯西馬卜家喀巴卜山所出之水會馬卜家喀巴卜者譯言孔雀口也其水南行至那克喇蘇木多地會東行之水東南流至額訥特可克國為岡噶穆倫江卽佛法所謂恒河也佛國記載魏法顯順恒河

入南海至山東之勃海入口應即此水矣梵書言四大水出於阿耨達山下有阿耨達池以今考之意即岡底斯是唐古忒稱岡底斯者猶云衆山水之根與釋典之言相合岡底斯之前有二湖連接土人相傳為西王母瑤池意即阿耨達池又梵書言普陀山有三一在額納特可克之正南海中山上有石天宮觀自在菩薩遊舍是云真普陀一在浙江之定海縣海中為善財第二十八叅觀音菩薩說法處一在土伯

特今番名布搭拉山也亦謂觀音現身之地釋氏之書本自西域故於彼地山川亦可引以為據也禹貢導黑水至於三危舊註三危為山名而不能知其所左朕今始考其實三危者猶中國之三省也打箭爐西南達賴喇嘛所屬為危地拉里城東南為喀木地班禪額爾得尼所屬為藏地合三地為三危耳喀喇烏蘇由其地入海故曰導黑水至於三危入於南海也至於諸番名號雖與史傳不同而亦有可據者今

之土伯特即唐之突厥唐太宗時以公主下降公主
供佛像於廟今番人名招招者譯言如來也其地猶
有唐時中國載去佛像明成化中烏斯藏大寶法王
來朝辭歸時以半駕鹵簿送之遣內監護行內監至
四川邊境即不能前進而返留其儀仗於佛廟至今
往來之人多有見之此載於明實錄者爾等將山川
地名詳細考明具奏

臣等謹按唐一行言天下山河之象存乎兩

戒北戒負終南地絡之陰自北而東為北紀
南戒負終南地絡之陽自西而南為南紀此
特就中國之地以終南山分兩戒而其說未
盡也考禹貢所導大川有四河與江漢同入
東海而三水之源並在諾莫瑋烏巴西達罕
以內惟黑水入於南海而其源則在諾莫瑋
烏巴西達罕以外幹以外者南幹以內者東
所謂兩戒之說也然而自古以來未有知而

言之者惟我

聖祖仁皇帝五十六年

詔遣喇嘛楚兒沁藏布喇木占巴及理藩院主事勝住
等徧歷西海西藏所在量測星野圖畫地形
於江河諸水無不盡得其源委復

命廷臣詳考名實載之職方傳信萬世皇哉備矣方今
諸番回部內隸臣僕西極之壤盡入版圖直
包烏斯藏西南以外

皇上命使候星辰度道里圖寫職方用資

乙覽莫不以照以臨歸我同文之盛極從古未到之
絕域考歷代未拓之遠猷又豈止於都護所
領槃木所譯而已哉

壬午

命四川總督年羹堯酌定官兵凱旋入口諸路

年羹堯疏言大兵平藏後有從征把總哈元成
還言自西寧進藏路瘴氣獨盛現在平藏師旋

並欲由巴爾喀木一路臣度凱旋軍士所攜口糧計日尚有餘所慮馬匹至中途疲甚雖有口糧或不能裹負而行謹飛檄各處多運米以備接濟議政大臣等議如所請奏入得

旨依議年羹堯奏進藏大兵由巴爾喀木一路凱旋朕念武格等所領滿兵由雲南出口進藏今回兵時若仍令往雲南則路途遙遠著即同四川省凱旋之兵從四川入口其雲南綠旗兵丁著年羹堯擇路近之

處發往雲南西寧進藏兵著從松潘一路行走至松
潘後相視道里遠近或從口外前往西寧或從口內
行走俱著年羹堯酌量辦理

丁亥

增給征西將軍祁里德軍前滿洲兵

上諭議政大臣等曰將軍祁里德奏伊軍前滿洲兵少
請將將軍傅爾丹處所領右衛滿兵酌量撥給朕思
傅爾丹處之兵不必調遣可將右衛烏鎗兵派五百

名京城烏鎗兵每旗派四十名發往祁里德軍前又
富寧安軍前滿兵亦少傅爾丹駐兵之處與巴里坤
相近或將傅爾丹所領滿兵量撥富寧安軍前又祁
里德傅爾丹兩路官兵或合為一處爾等議奏尋議
曰應發右衛漢兵五百八旗滿兵三百二十令
副都統瓦哈里率之赴祁里德軍其傅爾丹所
屬漢兵調給富寧安軍至祁里德傅爾丹兩路
兵或應合一路請令大將軍會議奏

聞再議奏入

上從之

十二月庚申

振武將軍傅爾丹等請預給官兵明年俸餉

傅爾丹等疏言明年大兵進勦請借支官兵一

年俸餉銀凡二十六萬三千四百兩有奇於每

季每月扣除如數議政大臣等議如所請奏入

得

旨軍興時需用錢糧甚多爾等於傅爾丹奏請之處應相度機宜詳核定議明年果否進兵及官兵之馬匹器械曾否齊備糧餉作何運送將軍等並未奏聞爾等亦未議及止議借支餉銀倘明年不進兵至後年進兵將再借乎否乎從前運到軍前之米及種地所收之糧果否足用又各官自備牛種交收之糧或係空名亦未可定官兵惟以借餉為事不思借無底止則錢糧易至匱乏矣如聽信兵丁之言預期借餉又

徵倖明年撤兵或謂功成之日必邀恩免此豈將兵之道乎爾等不加詳核罷軟從議亦屬不合軍務本無年限必詳加籌度使糧無匱乏乃於軍務有益此本著再議具奏尋議曰傅爾丹奏請支餉一年即給不便應令大將軍等會議明年當進兵與否及傅爾丹一路兵餉可否支給具摺奏

聞再議奏入

上從之

康熙六十年春正月辛巳

議叙勦撫生番官兵

四川總督年羹堯疏言打箭爐外里塘所屬上下牙色上下雅尼巴塘所屬桑阿壩林卡石等處生番出沒不常數行剽掠臣遣兵勦撫悉降之議政大臣等議俟軍務告竣官兵悉予議叙
奏入

上從之

癸未

撫遠大將軍允禔奏報平逆將軍延信兵送達
賴喇嘛至藏

允禔疏言據平逆將軍延信報大兵送達賴喇
嘛赴藏道出雷東噴多等處喇嘛人衆感激

聖恩罔不踴躍男婦老幼望我天兵襁負走迎羣來環
繞競奏種種樂器合掌跪云自準噶爾賊人據
土伯特以來父子夫婦劫掠離散人人凍餓自

謂此生不能再覩天日今

聖主興師勦賊拯我土伯特人出之水火更享昇平之

福生死月骨無以仰報紛紛來言出於至誠

奏入報

聞既而允禩又疏言西藏已定駐防尤急今兵留者扎

薩克蒙古兵五百額駙阿寶兵五百察哈爾兵

五百雲南兵三百四川兵千有二百以公策旺

諾爾布轄之至空布所在第巴阿爾布巴率先

効順從軍取藏阿里所在第巴康濟鼎與準噶
爾仇讐擒賊部人斷賊歸路第巴隆布鼎以身
來歸並請授以職銜伏候

諭旨奏入得

旨第巴阿爾布巴第巴康濟鼎著俱授為貝子第巴隆
布鼎著授為輔國公

三月己丑

命平逆將軍延信等統兵駐藏

上諭議政大臣等曰藏地甚屬緊要現在雖有蒙古綠旗兵三千名駐彼但延信已將將軍印信帶回並無將軍統管兵馬又無滿兵駐劄不可不加籌畫雲南有副都統噶什所領滿兵一千著派五百名並四川歇息之綠旗兵五百名發往速行文延信令其前往藏地延信及雲南四川兵到藏如彼地食物米糧稀少可將喀喇沁翁牛特兵撤回西寧公策旺諾爾布仍駐彼處著議奏尋議政大臣等議曰江寧杭州滿

兵留雲南者令都統武格副都統吳納哈率五百人即由雲南取道進藏綠旗兵在四川休息者令總督年羹堯將軍噶爾弼遣一總兵官一副將率五百人即由打箭爐進藏將軍延信可毋往西寧令佩將軍印還四川率四川兵進藏統諸軍駐劄奏入得

旨依議前令原任雲南總督蔣陳錫巡撫甘國璧接應進藏兵糧餉贖罪効力若尚未去令與此兵同往如

已赴藏地令應付此兵糧餉効力

庚寅

命大將軍允禩會同三路將軍定議進勦

允禩疏言據三路將軍報稱各路馬駝糧餉俱
充足器械俱備官兵咸思奮勇進勦乘策妄阿
喇布坦人心震動即此進兵擒賊可以直入蕩
其巢穴奏入得

旨著議政大臣滿漢九卿詹事科道會同詳議具奏尋

議曰令靖逆將軍富寧安調兵至烏蘭烏蘇駐劄即軍中選七千人令散秩大臣阿喇衲甘肅提督路振聲領之自烏蘭烏蘇路進取吐魯番如得其地即令富寧安撥阿喇衲所領兵守之但進取吐魯番士馬恐不足當於振武將軍傅爾丹軍選三千人益富寧安軍傅爾丹及征西將軍祁里德各於所在駐劄候調再於祁里德軍中選三千人進略地收取策妄阿喇布坦及

烏梁海逃竄者無人則撤還合軍一路設此時
策妄阿喇布坦部內有變偵得消息三路將軍
即相時乘機統大兵進勦奏入得

旨議政大臣等所議甚是朕意亦如此籌算將此行丈
與大將軍令三路將軍各行定議具奏

平定準噶爾方略前編卷八